

चंदा रे तू छिप मत जैयो  
 कृष्ण चंद के संग थिर रहियो  
 बोलै कोयल मोर, मेरी अटरिया में।  
 कृष्ण रंग में रंगी गोपिका  
 गोपी प्रेम में श्याम हू बिका  
 जागत ही भई भोर, मेरी अटरिया में॥

-----O-----

*मत बनै निरमोही सांवरिया रे॥*

यमुना तट पर रात-रात भर बैठी देखूं लहरिया रे।  
 चांदी सी चमकै सब रेती, खिलै जब रात जुन्हैया रे।  
 देख्यो करं बाट मैं हरदम, आवै कौन डगरिया रे।  
 सावन गरजे भादों बरसै, ब्यार चलै पुरवैया रे।  
 देख्यो करं बाट मैं तेरी, सूनी परी अटरिया रे।  
 रिमझिम-रिमझिम मेहा बरसै, चमक रही है बिजुरिया रे।  
 देख्यो करं बाट डार के झूला कदम की डरियां रे।  
 पूनों की जब खिलै उजारी, महकै फूल कियारिया रे।  
 कहाँ मिलैगो रे बेदरदी, सुनती रहूं बंसुरिया रे।  
 आवै ना कर के नितुराई, तरफूं जैसे मछरिया रे॥

*कोल मेरे धंस आयो, कारी अंधेरी में॥*

जैसी कारी रात अंधेरी  
 तैसौ कारी कौड धर्यो री  
 मैं निधरक हवै सोय रही री  
 आय औचकइ जगायो, कारी अंधेरी में।  
 पूछन लागी कौन तू आयौ  
 कहा गरज ते मोय जगायौ  
 नाम गाम कछु नाय बतायौ  
 कहाँ सुन क्यों मैं आयौ, कारी अंधेरी में।  
 मेरी नाम गाम तू जानै  
 पनघट ही ते मोय पहचानै  
 सेनन में तेरी मन मानै  
 कियौ तें मन कौ भायौ, कारी अंधेरी में।  
 अपनी गाँव नाम मैं खोलूं  
 मैं ब्रज के गामन में डोलूं  
 ब्रजवासिन सौं हँसतौ बोलूं  
 नाम ब्रजराज कहायौ, कारी अंधेरी में।



जो तू ब्रज को राजा ऐसी  
बिना बुलाये आयबो कैसो  
चोरन को तू राजा वैसो  
चोर के माखन खायो, कारी अंधेरी में।

गोपी गवाला ब्रज में मेरे  
दोरी के नाय दोष धनरे  
बन्यो श्याम तुम सबके चरे  
प्रेम सौं कण्ठ लगायो, कारी अंधेरी में।।

-----O-----

कन्हैया ते प्रीति किये पछतावी।।

उनकी प्रीति रही सखी कैसे, जैसे कोई कहानी।  
हम जानी यह प्रीति निभैगी, नैक न राखी कानी।  
कारो भंवरा कहाँ वह उड़ गया, सूनी भई जिंदगानी।  
ब्रज की गोपी ऐसे बोली, कुब्जा भई पटरानी।  
ऐसो निटुर अहीर को जायो, जोग की बात बखानी।  
तन को कारो मन को कारो, पहले ना हम जानी।  
अब ये नैना हू पछतावै, झर-झर बरसत पानी।।

वा दिन बिक गई जा दिन देख्यो, मैंने सुन्दर लन्द कुमार

गौने की मैं नई लुगाई  
ब्याही बड़े धरन में जाई  
लाज बंधी मैं बहू कहाई  
दुखने तिखने बास भयो जहाँ जाय न नर और नार।

बड़ो चतुर है ब्रज को रसिया  
करै छेद नभ की हु बदरिया  
निकरियो मेरी गली संकरिया  
गेंद खेलतो चलतौ आयौ तैकें संग के गवार।

सुन कोलाहल लागी झांकन  
टाढ़ी देखन लगी झरोखन  
चतुराई कीनी मनमोहन  
गेंद उछार देख ऊपर कूँ दीयो जादू झार।  
मिली आँख कोऊ देख न पायो  
बांकी चितवन चितहि चुरायो  
श्याम रंग हिय नैन समायो  
सावन के अंधरे को सूझै सबरो जग हरियार।



बैला हरि सों ऐसे उरझे, सुरझल की बही नैकहु आस।

में जब ते या ब्रज में आई  
झूँघट कबहु न खोल्यो माई  
काहु ते नहिं हैंसी हैंसाई  
बचती रहियो नंदलाला सों, कहती मेरी सास।

बचती रही बहुत भय खाती  
जाने कहा करै उत्पाती  
एक दिना में जमुना जाती  
गैल गिरि मोतिन की माला, ढूँढ फिरी चहुं पास।

माला ढूँढ रच्यो हरि जाला  
पीछे टेर रह्यो नंदलाला  
माला परी मिली ब्रजबाला  
मैंने पीछे मुरकैं देख्यो, सुन्दर रूप प्रकास।

मो देखत ही भई ठगोरी  
गई कहाँ वह लाज निगोरी  
नैन धरे को फल देख्यो सी  
नैना चुभे नुकीले हियरे मधुर हास की फाँस।।

ठाड़ी रहियो रे मत जैयो तेरी सों में आऊँगी।।

कुँवर लाड़ले नन्द महर के  
तो ते नेह लग्यो मन करके  
में वारी या श्यामल रंग पै  
जल भरवे निकसी हूँ, कैसे सीती जाऊँगी।

याही कदमन नीचे आऊँ  
बछरा पानी प्यायवे लाऊँ  
पक्की कर लै अब मैं जाऊँ  
चूनर मेरी छोड़ दै, माखन मिसरी लाऊँगी।

जैयो मत ह्याई मिल जैयो  
तौ लौं कान्हा वंशी बजैयो  
या वन में तू गाय चरैयो  
मेरे मन की रखियो, तेरे गुन में गाऊँगी।

मैं तो फूल, भंवर तू चंचल  
उड़-उड़ अइयो मेरे अंचल  
निधरक रस लीजो तज के छल  
मैं गोरी तू मेरो रसिया, जोट मिलाऊँगी।।



में वारी तेरी अइयो रे कान्हा, दऊँगी तोकुँ सद्धमाखन॥

ऐसो माखन कोउ न चाख्यो  
में वारी तेरी खैयो रे कान्हा, दऊँगी तोकुँ..।

ऐसो माखन कोउ न देख्यो  
में वारी हँस पैयो रे कान्हा, दऊँगी तोकुँ..।

ऐसो माखन मीठो रस भर्यो  
में वारी रस तैयो रे कान्हा, दऊँगी तोकुँ..।

ऐसो माखन सब भुलवावै  
में वारी मत जैयो रे कान्हा, दऊँगी तोकुँ..।

वंशी बजैयो नाच नचैयो  
में वारी कछु गैयो रे कान्हा, दऊँगी तोकुँ..।

तिरछी चितवन देख-देख के  
में वारी हँस दैयो रे कान्हा, दऊँगी तोकुँ..।

मेरी गलियन नित-नित अइयो  
में वारी तंह छैयो रे कान्हा, दऊँगी तोकुँ..॥

-----O-----

खेलैं गेंद कृष्ण ब्रजराय बिरज की डागरिया॥

पनिहारी उत ते जाय सीस पै गागरिया॥

खेलत गेंद गिरी मग माहीं प्यारी लई उठाय,  
हरि की दृष्टि बचाय लाड़िली अंचरा लई छिपाय,

रंगिली चूनरिया। खेलैं गेंद....

ढूँढत हार गये नंदनंदन चतुराई गई भूल,  
मुसक्याई वृषभानुनंदिनी श्री यमुना के कूल,

समझ गये सांवरिया। खेलैं गेंद....

मेरी गेंद लई है तुमनें, दै देओ भानुदुलार,  
में भोरौ तुम चतुर नागरी हमने मानी हार,

चुराई तब बांसुरिया। खेलैं गेंद....

पहले लियौ नचाय लाल को, फिर वंशी बजवाय,  
मन चाही करवाय कृष्ण ते, गेंद दई तरसाय,

कियो वश नागरिया। खेलैं गेंद....

-----O-----



तेरे बिना में रोई रे सांवरिया तेरी याद में,

कन्हैया तेरी याद में॥

जब आई रैन अंधेरी, तालों पे आई अकेली  
घाटों पे बैठी रोई रे, सांवरिया तेरी..।  
जब आई रैन अंधेरी, जमुना पे गई अकेली  
जमुना तट बैठी रोई रे, सांवरिया तेरी..।  
जब आई रैन अंधेरी, वन कुंजन गई अकेली  
डाली पकड़ में रोई रे, सांवरिया तेरी..।  
जब दही चलावन बैठी, घर में में रही अकेली  
मथनियां पकड़ में रोई रे, सांवरिया तेरी..।

-----O-----

कन्हैया प्यारे आय जइयो, बरसानों मेरो गाँव॥  
बहुत दिना ते बाट देख रही सुन्दर श्याम सुजान,  
अबतो दरस दिखायजा लाला, अटक रहे हैं प्रान,  
तू मोय जियावन आय जइयो, बरसानो मेरो गाँव।  
सूनो सूनो लागत प्यारे तो बिन सब संसार,  
रस की बगिया सूख गई है, सूख गयो व्यवहार,  
तू मेहा बनके आय जइयो, बरसानो मेरो गाँव।

वंशी मधुर बजाय के मन मेरो लीयो छीन,  
बावरी सी इत-उत में डोलूँ, जल बिन तरफे मीन,  
वंशी की टेर सुनाय जइयो, बरसानों मेरो गाँव।  
टेढ़ी पाग लटकती बायें, तापै पेंच जड़ाव,  
कजरारे तीखे नैना लटकी लट देत धुमाव,  
प्यारी झाँकी दिखराय जइयो, बरसानों मेरो गाँव॥

-----O-----

श्याम रंग में ऐसी भीनी, श्याम भई में श्याम॥  
घर में श्याम श्याम बाहर हू, जित देखूँ तित श्याम,  
मेरे तो जीवन हैं श्यामहि, श्याम भई में श्याम।  
सोवत श्याम श्याम जागत ही, चलते फिरते श्याम,  
श्याम श्याम की रटना लागी, श्याम भई में श्याम।  
पनघट श्याम श्याम जमुना तट, ब्रज गलियन में श्याम,  
डगर-डगर में श्याम देख रही, श्याम भई में श्याम।  
कुञ्ज-कुञ्ज में श्याम डार में, पात-पात में श्याम,  
दूध दही माखन में श्यामहि, श्याम भई में श्याम।  
श्याम सजन श्यामहि प्रिय संगी, मेरी सजनी श्याम,  
श्याम प्राण और श्यामहि काया श्याम भई में श्याम।



मज तो मेरो ले लियो राधा के रसिया श्याम नैं॥  
 यमुना तट पै में खड़ी नीले जल से टेरुं,  
 लहरों से उठ कर ओ रसिया ऐयो मेरे सामने।  
 गहवर वन में मैं खड़ी लता वृक्ष में टेरुं,  
 वन उपवन ते बाहर रसिया ऐयो मेरे सामने।  
 कुंज निकुंजन में मैं खड़ी पात-पात से टेरुं,  
 फूलन ते बाहर ओ रसिया ऐयो मेरे सामने।  
 गिरि गोवर्द्धन में खड़ी तौर-तौर पै टेरुं,  
 शिला-शिला ते रूप धरे तू ऐयो मेरे सामने॥

-----O-----

आई घटा करी-करी, आओ श्याम मुरारी॥

आधी रात में बादर गरजै  
 बिजुरी चमकै भारी, आओ...।  
 मोतिन झालर पचरंग पलका  
 ऊँची हमारी अटारी, आओ...।  
 टंडी ब्यार चलै पुरवैया  
 खूटी हमारी किंवारी, आओ...।  
 आस-पास नांय कोई बाखर

सब ते रहूँ में न्यारी, आओ...।  
 कोयल कूँकै मोरा बोलै  
 झींगुर की झनकारी, आओ...।  
 नहनी परै फुहार सुहानी  
 ओढ़ कमरिया करी, आओ...॥

-----O-----

चलो ऐयो तू मेरी डगरिया॥

नंद महर के कुंवर लाइले,  
 मैं वारी रे तेरी सांवरी सुरतिया।  
 टेढ़ी पाग लटुरिया करी,  
 मैं वारी रे तेरी मृदु मुसकनियां।  
 अलबेलो छैला तू रसिया,  
 मैं वारी रे तेरी उठती उमरिया।  
 गावै नाचै धूम मचावै,  
 मैं वारी रे तेरी मीठी बंसुरिया।  
 रस के भरे रसीले नैना,  
 मैं वारी रे तेरी तिरछी नजरिया।  
 बड़ी-बड़ी बेंया लै गलबेंया,  
 मैं वारी तेरी पतरी कमरिया॥



ऊधम मोपै सहाो न जाय,

यशोदा हम तो बरसैं कहुँ ओर ।।

आगे पीछे मेरे डोलै तेरो नंद किशोर,  
घुंघट खोलै बैयां पकरै, खेंचै अंचरा छोर ।  
गवालबाल लै घर घुस आवै, तेरो माखन चोर,  
माखन दूध दही सब चोरै, मटकी देवै फोर ।  
गली सांकरी मारग धरै, करै अनीती घोर,  
मांगै दान अटपटो छैला, पकर दई झकझोर ।  
अचकै आय झरोकन झांकै, बात करै रस बोर,  
कह लों कहों कुचाल लाल की, रात न जानै भोर ।  
बड़ो लाड़लो कान्हा मेरी, बात सुनै ना शोर,  
छोड़ जायगी यह ब्रज नगरी, अंतहि ठौर टटोर ।।

-----O-----

पिय तेरे संग नचूंगी नचूंगी ।।

कुल की लाज भार में डारुं  
घुंघट आग दजंगी दजंगी ।  
कोई कितनो रोकै टोकै  
तोते आय मिलूंगी मिलूंगी ।

कोई कितनो बंधन बांधै

तेरे संग चलूंगी चालूंगी ।  
जैसे रखैगो तैसे रहूंगी  
तेरे बिन ना रहूंगी रहूंगी ।  
भूख प्यास औ मरनो जीनों  
विपत अनेक सहूंगी सहूंगी ।  
यमुना तट कदमन की छैया  
बंशी मधुर सुनूंगी सुनूंगी ।।

-----O-----

श्याम नैं अकेली पायकें धर लई मोहि आन,  
बैरिब आय लई लाज ।।

जाय रही मैं घुंघट मारे, पीछे ते चुप आयो वो,  
अचकअचक मेरो अंचरा पकरयो, खेंच्यो औ चौंकायो वो ।  
मैंने मुड़कें पीछे देख्यो नील कमल ब्रजराज ।।  
इक टक देख रह्यो वो मोकूं, मोपै चितै न जावै है,  
मीठे-मीठे सैन चलावै, मेरी आँख झपावै है ।  
लाजन मेरे आँसू आगए देखत भयो अकाज ।।  
धीरे-धीरे कहन लगयो कछु, मेरी समझ न आवै है,  
बांह गहत तन कांपन लगयो, तन की दशा हिरावै है ।



बेसुध सी मैं ऐसी है गर्ह, भूली सब समान।।  
वा दिन ते मेरी अँखियन में, ऐसो रूप समाया है,  
घर में वन में जल थल नभ में, सब ठां श्याम दिखायो है।  
कैसी प्रीति जुरी बैरिन सी, गिरी हो जैसे गाज गाज।।

-----O-----

अइयो-अइयो रे सांवरिया मेरी गालियन अइयो रे।  
जमुना तट पै गाँव लहर को झोंका खैयो रे,  
छपका छपकी चुब्बक खेलै, खूब नहैयो रे।  
जमुना तट फूली फूलवारी बगियन अइयो रे,  
कमलन की माला पहराऊँ, हार धरैयो रे।  
कारी काजर धौरी धूमर गाय धिरैयो रे,  
खिरक दोहनी लैंके आऊँ, दूध दुहैयो रे।  
पनघट पै लै गागर आऊँ, तू मिल जैयो रे,  
गागर भर ठाड़ी जब देखूँ, आय उचैयो रे।  
बड़े भोर मैं दही बिलोऊँ, मिसरी पैयो रे,  
सद लौनी माखन की दूंगी, झिक कें खेयो रे।  
ऊँची अटरिया लाल किवरिया चढ़ के जैयो रे  
फूलन सेज लिपट के तन की तपन बुझैयो रे।।

सांवरि तोहे लब्द दुहाई, अइयो रे कूँवर कन्हाई।।

जो तू आवै पीरी फाटै  
मैं तो मिलूंगी दह्यो चलाई, अइयो रे..।  
जो तू आवै सूरज ऊगे  
मैं तो मिलूंगी पनघट जाई, अइयो रे..।  
जो तू आवै तनक चढ़े दिन  
मैं तो मिलूंगी जमुना न्हाई, अइयो रे..।  
जो तू आवै बीच दुपहरी  
मैं तो मिलूँ पिछवारे आई, अइयो रे..।  
जो तू आवै सांझ की बिरियां  
मैं तो मिलूंगी गाय दुहाई, अइयो रे..।  
जो तू आवै रैन अंधेरी  
मैं तो मिलूंगी सबन सुवाई, अइयो रे..।।

-----O-----



## सावन

मोरा कोहक कोहक के बोले, आई सावन की बहार।

नभ में घुर रहे बादर कारे

जैसे ऊपर बजें नगारे

देख के मोरा पंख परसारे

झूम-झूम के नांच रहे हैं मंदी परै फुहार।

ऐसे में निकसे पिय प्यारी

मन में लहर उठी मतवारी

लता-पतन की झूमन न्यारी

पटुका और चुनरिया फहरै सीरी चल रही ब्यार।

वन विहरैं रस भीनी जोरी

सुन्दर नवल किशोर किशोरी

चले जात गहवर वन ओरी

मधु टपकाय लता फूलन ते बरसावैं रसधार।

कबहुँ जावैं मोर-कुटी चढ़

कबहुँ देखैं चढ़ै मान-गढ़

कबहुँ गलबैया विलास-गढ़

धन्यधन्य ब्रह्माचल विहरैं जहाँ युगल सरकार।।

बादर गरजें बिजुरी चमकै पानी बरसै गोलालार।।

बादर चढ़ रहे धूम-धुमारे

धौरे पीरे कारे कारे

कोई कोई धूम धुमारे

मानों फौज चढ़ी राजा की करदे पटिया पार।

तैसी ब्यार चलै पुरवैया

देय झकोरे है सुखदैया

मोरा लेय रहे फिरकैया

बूंदन की वे लगैं पछाटैं अरटि की मार।

ऐसे में इक बनी अटारी

जा पै बैठे प्रीतम प्यारी

श्री राधा और श्री बनवारी

हरियाली की छटा देख रहे सावन पै बलिहार।

देखैं गहवर की हरियारी

सुनैं कूक कोयल की प्यारी

पी पी करै पपैया भारी

सुन रीझैं रस भीजैं देवें गरबैयन के हार।।



सावन की अंधियारी रात बिजुरिया चमकै आरम्भार

घुप्प अंधेरी नभ में छाई  
कारी घटा बड़ी टकराई  
मानों है रही बड़ी लड़ाई

गहर गहर के कारे बादर गरजें बारम्बार ।

बिजरी कौंध रही मतवारी  
अखियन चौंधा दै रही भारी  
धिर न रहै ऐसी सटकारी

बड़ी-बड़ी बूंदन मेहा बरस्यो है गई धारम्भार ।

डरप रही इक ब्रज की नारी  
हवांई देख रहे गिरिधारी  
मन में रीझ बहुत भई भारी

श्री मोहन नें बांह गही जब कीनी तारम्भार ।

कामर की हरि करी खोइया  
एकइ में गोरी औ रसिया  
लाजन गोरी रोकै हँसिया

बाहर भीतर रस बरसै झर लग गई झारम्भार ।।

कैसे झूम रहे अम्बर में प्यारे बादर मतवारे ।।

टोल टोल हाथी से आये  
लटक लटक धरती लौं छाये  
चारों ओर घूम रहे धाये

धौरे पीरे धूम धुमारे कजरारे कारे ।

गरजन लगे एक संग मिल के  
बरसन लगे बड़ी बूंदन ते  
धुँआँधार भयो मेहन ते

ताल तलैया नदी सरोवर भर गये जल भारे ।

आय फंसी या लता पतन में  
सखी सहेली कोऊ न संग में  
इकली रह गई गहवर वन में

लेहु उढ़ाय कमरिया अपनी हा-हा खाऊँ रे ।

सुनतइ आये श्री गिरिधारी  
खोइ में तीनी ब्रज की नारी  
कोयल बोल रही धुनि प्यारी

कैसी हरियाली छाई, चल तोय दिखाऊँ रे ।



चले संग ले भीतर कुंजन  
गोरी भीज रही है लाजन  
अंगिया चूनर पकरे हाथन  
सुन इक बात रसीली, प्यारी तोय सुनाऊँ रे ।।

-----O-----

### झूलल माधुरी

एजी सुनो बंशी बजैया, कण्ठैया झूलुंगी हिंडोरे ।।  
घर में झूलुं बाहर झूलुं, तेरे संग झूलुं अंगनिया ।  
ऊपर झूलुं अटरिया पै झूलुं, तेरे संग झूलुं सेजरिया ।  
कुंजन झूलुं निकुंजन झूलुं, संग झूलुं यमुना लहरिया ।  
उपवन झूलुं कदमवन झूलुं, झूलत में बाजै बांसरिया ।  
फूलन की डारन पै झूलुं, झूलुं में फूलन पटुलिया ।।

-----O-----

आयो आयो मेरे झूलल आयो मोहना ।।

फूलन की पटरी फूलन की डोरी,  
मेरे फूल हिंडोरा छाये मोहना ।  
मेरे हिंडोरा पै फूल बिछौना,

मैंने चुन-चुन कलियां सजाये मोहना ।  
मेरे हिंडोरा पै जूही मालती,  
मैंने बेला गुलाब सजाये मोहना ।  
मेरे हिंडोरा पै खरस छिरकायो,  
जामें भीनी सुगन्ध फैलाये मोहना ।  
मेरे हिंडोरा पै बंसी बाजी,  
गीत अनेक गवाये मोहना ।  
मेरो हिंडोरा जमुना तट पै,  
लहरन झोका खाये मोहना ।।

-----O-----

सरर सरर रे हौं, सरर सरर रे

झूला झूलें राधेश्याम ।।

फरर फरर रे हौं पटका फहरै श्री घनश्याम ।  
फरर फरर रे हौं चूनर फहरै प्यारी भाम ।  
झरर झरर रे हौं फूलन बरसै कुंजन धाम ।  
हरर हरर रे हौं यमुना बह रही आठों याम ।  
छरर छरर रे हौं बूंदरिया पर रही अविराम ।  
चमचम चमचम रे हौं बिजरी चमकै चामाचाम ।।



रसीलो सावज आयो, झूलें कदम की छांह।।

विनती सुनिये राधा प्यारी  
हरियाली में फूली क्यासी  
मुसक्यार्ई सुन भानुदलारी  
कह्यौ यह मन कौ भायो डार चली गरबांह।

चले जात दोउ धीरे धीरे  
श्री यमुना के तीरे तीरे  
छलक रह्यो जल नीरे नीरे  
पपैया बोल सुनायो, कुञ्ज गली की राह।

फूल्यो कदम फूल अति भारौ  
झूला फूलन तेई संवारौ  
वा पै झूलैं प्यारी प्यारौ  
अनौखो रस बरसायो, लता-पतन की छांह।

गीत गावाँ ब्रज की बाला  
चिरजीवो राधा नन्दलाला  
झोटा में सखि दै रहीं ताला  
धोर गीतन कौ छायो, वृन्दावन के मांह।।

कै.पी ऋतु सावज की आई, जामें झूलन की बहार।।

कोयल कैसी गाती डोलैं  
मोरा नाचैं पंखन खोलैं  
दादुर और चकोरा बोलैं  
पी उ पीउ ये रटैं पपैया झींगुर की झनकार।

इन्द्र-धनुष उग्यो रंगीलो  
बादर झमक चढ्यो गरबीलो  
मन्द-मन्द गरजै बरसीलो  
नहनी-नहनी बूंदरिया की ठंडी परे फुहार।

ऐसे बचन कहैं मनमोहन  
चलीं छबीली चन्द लजोहन  
जाय छिप्यो बदरी के गोहन  
रेशम की डोरन ते झूला पर्यो कदम की डार।

झूला नव फूलनहि संवार्यो  
फूलन सब सिंगारहि धार्यो  
गोद उठाय प्रिया बैठार्यो  
दोनों झूला गावैं बरसे गहवर रस की धार।।



प्यारी झूलन में रस बरसै झूलैं चल के दोऊ आज।

फूल रही कदमन की जाली  
जमुना तीर निरखिये आली  
नये नये कमलन की लाली

रेशम डोर हिंडोरा डारयो सामन को सब साज।

नवल किशोरी चढ़ी हिंडोरे  
जैसे दामिनी लेत हिलोरे  
गावैं गीत चित को चोरे

सुन्दर श्याम राधिका गोरी ज्यों बादर संग गाज।

इक हाथन ते जोरी पकरें  
दूजे गलबैया में जकरें  
झोटा ते पीताम्बर फहरे

जमुना जल के ऊपर झूला उड़ रह्यो जैसे बाज।

झोटा जोर दिये गिरिधारी  
डरपन लगीं प्रिया सुकुमारी  
बरजे नहिं मानैं बनवारी

लिपट गईं धनश्याम लाल सौं जोरी अविचल राज।

झूला झूल रहे पिय प्यारी, तीज हरियाली आई है।।

हरी-हरी लता झूम रही प्यारी  
छाय रही धरती पै न्यारी  
मानों सारी हरी संवारी

हरे हरे वृक्षन में ऋतु ये जोबन लाई है।

श्यामा-श्याम हिंडोरे झूलैं  
अरस-परस ते मन में फूलैं  
प्यारी बतियां कह-कह भूलैं

देखो देखो यह झूलन की ऋतु मन भाई है।

डालन पै बैठे पंछी गन  
खेलैं चोंचन में दै चोंचन  
पीवैं बरसा के झीने कन

झूलन में रस बरसै कारी घटा सुहाई है।

तीज मनावैं पंछी ब्रज के  
लाल लाड़िली के उत्सव के  
मोरा नाचैं पंख खोल के

भैरवा छेड़ैं खरज, रागिनी कोयल गाई है।।



झूला झूलै राधा प्यारी, चुन्बरिया फहर-फहर फहरै ॥

सामन की हरियाली छाई  
कारी घाटा बड़ी धिर आई  
ऋतु झूलन की है मन भाई  
जमुना तीर बहै पुरवैया सरर-सरर सररै ।

झूला पर्यो कदम की डरियाँ  
झीनी पर रहीं नहनी बुंदियाँ  
झोटा देय रही सब सखियाँ  
मुख पै लटक रही लट कारी लहर-लहर लहरै ।

उरझ परी वैजन्ती माला  
सुरझावत हैं श्री नन्दलाला  
खैच लियो तब भोरी बाला  
टूट परी मोतिन की माला छहर-छहर छहरै ।

ररकैं मोती झूला पर ते  
सखियाँ बीन रहीं नीचे ते  
टपकैं खिले फूल ऊपर ते  
फूलन गहना हार झरै हैं झहर-झहर झहरै ।

मुरलिया मधुर बजाई झूलत में गोपाल ॥

झूला झूल रहे गिरिधारी  
संग बैठी कीरति सुकुमारी  
मुरली सुनत मगन भई भारी  
रीझा कै कण्ठ लगाई, नवल किशोरी बाल ।

गावन लगीं मल्हार कुमारी  
कोयल मौन भई मतवारी  
मोर पपैया हूँ बलिहारी  
रसीली तान सुनाई, हाथन सौं दै ताल ।

सोई तान भरै मुरली में  
जो-जो प्यारी गावैं स्वर में  
लाग जाट के या गायन में  
प्रेम की बरसा छाई, भीजैं राधा लाल ।

राग मालिका गाय दिखावैं  
ताल मालिका भेद बतावैं  
लय माला सुन्दर दरसावैं  
अद्भुत भाव दिखाई, धारैं स्वर के माल ॥



झूला झूलें यमुना के किनारिया, राधा संग सावरिया।

झूला कदम की डारन डारयो

झूला फूलन तेई सवारयो

टंडी बह रही ब्यार पुरवैया, राधा संग..।

चोटी श्यामा जू की लहरै

पटुका गिरिधारी को फहरै

राधा रानी की उड़ती चुनरिया, राधा संग..।

मोरा पंखन खोल पसारै

झूमै नाचै हैं मतवारै

पीऊ पीऊ बोलै प्यारो रे पपैया, राधा संग..।

कारे कारे बादर आये

उमड़ धुमड़ कर ऊपर छाये

कैसी चमक रही है बिजुरिया, राधा संग..।

फूल रही है कदमन डारी

सुगन्ध फूलन की है भारी

झीनी-झीनी पड़ रही फुहरिया, राधा संग..।

बेला जुही मोंगरा फूले

फूल फूल पे भंवरा झूले

प्यारी लागे नन्ही-नन्ही बूंदरिया, राधा संग..।

बादर धीरे धीरे गरजें

ताल मृदंग बजै मन लरजै

मीठी बाजै मोहन की बांसुरिया, राधा संग..।

झूला ऊपर नीचे जावै

आंचर प्यारी को उड़ जावै

लग रही नटवर की ये नजरिया, राधा संग..।।

-----O-----

अरे राधा रानी चढ़ी हिंडोरे, तैकें गिरिधर को झूलें॥

इक घन गरजै इक घन बरसे

अरे पुरवाई चलै झकझोरे, तैकें गिरिधर..।

बादर बीच बीजरी चमकै

अरे इत भामिनी तेत हिलोरे, तैकें गिरिधर..।

झीनी बुंदिया ऊपर पड़ रही

अरे झरै सीस ते माला फूलें, तैकें गिरिधर..।

पपीहा बोलें कोयल गावें

अरे इत चुनरी उड़ै न थोरें, तैकें गिरिधर..।।



कदम दल झूलल आई श्यामा ।।

फूलन सारी फूलन अंगिया,  
वो तो फूलन लंहगा लाई श्यामा ।  
कदम के फूलन सज्यो हिंडोरा,  
वो तो पटुसी कदम की लाई श्यामा ।  
कदम फूल की बनी कौंधनी,  
कदम के बिछुवा लाई श्यामा ।  
कदमन कुंडल कदम की गूठी,  
वो तो फूलन गहने लाई श्यामा ।  
कुँवर कान्ह को संग बैठार्यो,  
वो तो फूल घटा सरसाई श्यामा ।।

-----O-----

झूलल लागी झूला प्यारी हुलसाय ।।

यमुना तीर कदम की डारन,  
हिंडोरे संग बैठे गिरिधर राय ।  
झमकि हिंडोरे पै जैसे बैठी,  
चुनारिया हाथे फरर-फरर फहराय ।

चल्यो हिंडोरा तेज चाल पै,  
जियरवा हाथे धकर-धकर धकराय ।  
जैसे हिंडोरे पै दुमची लागी,  
लिपट गई पिय सौं डरप डरपाय ।  
जबहि हिंडोरा पै गावन लीगी,  
कोयलिया हाथ मौन भई सकुचाय ।।

-----O-----

श्री राधा प्रेम नदी उमड़ी ।।

फैली ब्रज मण्डल वृंदावन रस ही रस उमड़ी घुमड़ी  
नव जीवनी सोन चंपा तन फूलन फूली सोन छड़ी  
पिय के तन में मन में हिय में राधा मूरति रहति गढ़ी  
श्याम सिंधु सौं मिलति कुंजमें सदा रहत पिय अंग पड़ी  
चापल चरन बिहारी निशिदिन नित्य सुहागिन भाग बड़ी  
नित्य बिहार महारस सुख की राधा पदरेणुका कड़ी ।।

-----O-----



## अवतार लीला

श्रीकृष्ण जन्म बधाई

जन्मे दीनदयाल रे, आठें बुद्ध रोहिणी भादों ।।

कृष्ण चन्द्र जन्मे मथुरा में

दूर भयो अधियारो जग में

जगे भाग्य सब भक्त जनन के

बन्धन खुल गये मात-पिता के

कट गई बेड़ी जाल रे, आठें बुद्ध रोहिणी... ।

सोय गये सब पहरे वारे

कारागृह के खुल गये तारे

बालक रूप मध्य पौढ़ायो

मात-पिता को हिय भर आयो

वसुदेव चले लै लाल रे, आठें बुद्ध रोहिणी... ।

रैन अंधेरी चलयो न जावै

चमक बीजुरी राह दिखावै

बादर रिमझिम जल बरसावै

देख पिता को मन घबरावै

कियौ छत्र जब व्याल रे, आठें बुद्ध रोहिणी... ।

चढ़ रही जमुना तीखी धारे  
जल में पाँव कहूँ ना ठहरे

डूब रहे वसुदेव पुकारे

कोई बचावो लाल हमारे

हरि नीचे पग डाल रे, आठें बुद्ध रोहिणी... ।

चरन परस के उत्तरी जमुना

पार भये भय रह्यो कछुक ना

पहुँचे नन्द भवन में जाई

सोय रही जहाँ यशुदा माई ।

सब सोये तोहि काल रे, आठें बुद्ध रोहिणी... ।

यमुना ढिंग लाला पौढ़ायो

कन्या लै निज गोद लगायो

चलन लगे तब हिय भरि आयो

अँखियन ते अँसुवा बरसायो

छाँड़ चले गोपाल रे, आठें बुद्ध रोहिणी... ।

कन्या लै कारागृह आयो

बन्धन ज्यों के त्यों लग आयो



रोवन लागी कन्या भारी  
आयो कंसासुर संहारी  
छीन लई वह बाल रे, आठें बुद्ध रोहिणी..।

पाँव पकर पटकी बरि आई  
अष्ट भुजा भई नभ में जाई  
देवी बोल रही यह बानी  
रे शठ तेरी मति बौरानी

जनम्यो कहूँ तब काल रे, आठें बुद्ध रोहिणी..।

भोरहि गोकुल बज्यो बधायो  
नन्द महर घर ढोटा जायो

आनंद भयो नन्द के द्वारे  
लाल कन्हैया की जैकारें  
नाचैं दै दै ताल रे, आठें बुद्ध रोहिणी..।

हरि के चरित बड़े सुखदाई  
जन्म अष्टमी लीला गाई

कृष्ण चरित जो गाय सुनावै  
निश्चय कृष्ण चरण कूँ पावै  
भक्तन के प्रतिपाल रे, आठें बुद्ध रोहिणी..।।

बाबा नन्द द्वार पै टाढ़े, कह रहे सुनो मेरे प्यारे।।  
जन्म्यो पूत एक मेरे जो रहे भाग भारे,  
तुम बारन कौ भयो लाड़िलो आँखिन के तारे।  
जो चाहिये सो लेउ निस्सर के, हम तो हैं त्यारे,  
अपने मन की आशा पुजवौ, बूढ़े औ बारे।  
सोना चांदी रतन अमोलक मोतिन के हारे,  
हार हमेल गले कौ कटुला आभूषण सारे।  
पाग पिछौरा और अंगरखा पटुका दै जारे,  
खुरचन दूध दही लड्डुवन के भोजन सुखकारे।  
उछर उछर कें हेरी गावैं मदमाते ज्वारे,  
नन्द बाबा कौ ढोटा जीवै, दै रहे जैकारे।  
द्वै लख गैयां दर्ई विप्र मंत्रन कौ उच्चारै,  
बछरा उछरैं कूदैं घननन गर घण्टा वारे।  
तिल के सात पहाड़ दिये जो ढके रत्न द्वारे,  
पूजा पितर देवतन की करवाय अशुभ टारे।  
दूध दही छिरकैं माटन ते चले बह पनारे,  
आँगन पाँव न टहरें, ऐसे बहे तहाँ खारे।।



बधाई बाजे मन्दिर में मंगल गावें हुलसाय ॥

नहाय धोय के नन्द बबा जु बैठे फर्स बिछाय  
सोने सींग मढ़ी गैया दर्ई सब बाम्हनन बुलाय  
मंत्र बोलें मन्दिर में, कानन में दूब धराय।  
तै दधि मांट सीस पै गोपी, आई महल के बीच  
दूध दही की होरी है गर्ई, भई रिपटनी कीच  
हार टूटें मन्दिर में गहना खुल खुल गिर जाय।  
गवाला नाचें गोपी नाचें रिपट-रिपट गिर जांय  
तारी दै-दै हैंसैं हैंसावैं, खेलें खाय सिहाय  
कौर देवें होठन में धूंधट में कर पहुँचाय।  
गवालन को दिये पाग पिछौरा पटुका झुब्बादार  
गोपिन को अंगिया लहंगा जामें नारो फुंदनादार  
झमक नाचैं मन्दिर में नर नारी जोट भिलाय।  
जसुदा ढिंग आई सब गोपी कहैं बधाई आज  
लाला सदमाखन को लौंदा श्याम रंग सरताज  
लाल देखैं मन्दिर में, आसीस देय मन भाय ॥

-----O-----

कण्ठ जलम लियौ आधी पै, धिर रही बादरिया करी

भादों कृष्ण अष्टमी आई  
सब जग में अधियारी छाई  
नखत रोहिणी नभ में भाई  
ताही समय चन्द्रमा ऊग्यौ सबकौ सुखकारी।

जै जैकार मची अम्बर में  
नाच रही अप्सरा गगन में  
गंधर्वन के गान तान में  
चढ़ विमान सुर करन लगे फूलन बरसा भारी।

नदियाँ सुख सौं बहन लगीं सब  
फूली पृथ्वी पवन चाल्यौ जब  
चारों ओर भये मंगल तब  
जीव चराचर सुखी भये सब सृष्टि भई प्यारी।

अग्निहोत्र की अग्नि उठी जल  
भय ते पहले बुझी कंस खल  
साधुन के मन आनंद निश्चल  
श्री देवी भू देवी मिल ब्रज छाई कर यारी ॥



बाजे बाजे री बधाई मैया तेरे अंगाला ॥

बड़ी अनोखो लाला जायो  
श्याम रंग सबको मन भायो  
ब्रजवासिन को मन हुलसायो  
उमग-उमग सब चले नन्द घर बांधे बंधना।

नन्द भवन ऐसो सजवायो  
बैकुण्ठहू को दियो लजायो  
सब लोकन ते घनो सुहायो  
टोल टोल गोपी उठ धाई गावें मंगना।

बाम्हन अपने वेद पढ़त हैं  
नंद बाबा जू दान करत हैं  
पाग पिछौरा ग्वाल लेत हैं  
गोपिनको दियो लहंगा फरिया रतन जटित कंगना।

नाच नाच के प्रेम दिखायो  
नन्द भवन में धूम मचायो  
देय असीस सबन मन भायो  
अरी जसोदा रानी तेरो जीवै छंगना ॥

गोपी इमक इमक के नाचें,  
ज्वाला गातें मीठे ताल ॥

नन्द भवन में बजी बधाई  
कोयल सी कौहकी सहनाई  
दोल झांझ ढप धुनी सुहाई  
गहक गहक के बाजन लागे चारों ओर निसान।

हेरी कह-कह ग्वाला गावें  
लकुट पिछौरा तै फहरावें  
उछरें और सबन उछरावें  
तारी दै दै हैंसे हैंसावे नैंक न राखें मान।

झूमक नाचें ब्रज की नारी  
ऐसो कोहकंदो भयो भारी  
मन भाई सी देवें गारी  
ऐसो आनन्द बढ्यो नन्द घर जब जनमें ब्रजप्रान।

मणि कुण्डल कानन में झूमें  
गुंथे फूल झुक गालन चूमें  
उछरत हार कुचन पै घूमें  
झमकै रवा कौंधनी बिछुआ मुंदरी कर पग पान ॥



खिल गये कमल रात में प्यारे,  
जब हरि जन्ममें आधी रात॥

भादो कृष्ण पक्ष शुभ आयो  
रोहिणी बुद्धवार दिन गायो  
तिथि अष्टमी सुमंगल छापो

आठें में भई पूरणमासी ऐसो निकरयो चन्द,  
विद्याधरी सुनावतीं सबके मन निर्द्वन्द्व।  
निर्मल भई दिशाएं सगरी, तारन सजी बारात॥  
खिल गये कमल रात में प्यारे..॥१९॥

पृथ्वी देवी मोदमयी हैं  
विविध रतन सौं छाय रही हैं  
हरि पति आये वधू भई हैं

ब्रह्मचारी वामन परशु सीतापति दामाद,  
अबलों तरसी अब ब्रजपति संग विलसुंगी धर हलाद  
रंग बिरंगी फूलन साड़ी धरनी पहारि सुहात।  
खिल गये कमल रात में प्यारे..॥२०॥

चौमासे की उमगी नदियाँ  
निर्मल जल सौं झरती झरियाँ  
संगम कर बतराती सखियाँ

प्रभु अवतार अनेक धरि नदियन मानी मात,  
कृष्ण रूप पति पाय कें सब नदियाँ सरसात।  
कालिन्दी पति जीजा सौं बतरावैंगी बलखात॥

खिल गये कमल रात में प्यारे..॥२१॥

पाँच तत्व हू मगन भये सब  
हम कूँ शुद्ध करेंगे हरि अब  
व्योमासुर वध सौं शोधें नभ

तृणावर्त वध वायु कालिया सो जल माटी खाय,  
भूशोधे कर पान अग्नि कौ सबै तत्व हुलसाय।  
निर्मल तत्वन सौं सब सृष्टि भई प्यारी रसमात॥  
खिल गये कमल रात में प्यारे..॥२२॥

-----O-----

कैसे जाऊं रे हौं-हौं नंद नू के द्वार,

सोच रहे वसुदेव जी।

हाथ हथकड़ी पांयन बेड़ी, लग रहे वज्र किवार  
बादर गरजै पानी बरसै, भयो घोर अधियार



डरप रहे वसुदेव जी।

या पार मथुरा वा पार गोकुल, बीच यमुन की धार  
चढ़ रही नदिया भंवर पड़ रहे सूझै नहीं किनार  
देख रहे वसुदेव जी।

खुली हथकड़ी खुल गई बेड़ी, खुल गये वज्र किवार  
शेष नाग ने छत्र कर्यो है, चमकै नव लख तार  
जाय रहे वसुदेव जी।

मथुरा सोयो गोकुल सोयो, सोई सृष्टी सारी  
लीलाधर लाली लै आये, योग माया औतारी  
आय गये वसुदेव जी।

लग गये तारे लग गई बेड़ी रोई कन्या भारी  
आयो कंसा पटक पछारी अष्टभुजा भई नारी  
कर जोरें वसुदेव जी।

बोली देवी नभ में टाड़ी, ओ रे अधम कसाई  
तेरो काल कहूँ है प्रगट्यो, काहे शिशु मरवाई  
सिर नावें वसुदेव जी॥

-----O-----

नन्द के भये नंदलाल, बिरल में आनन्द भयो॥

कौन ने पूजे कूआं बावड़ी, कौन ने पूजे ताल  
यशोदा ने पूजे कूआं बावड़ी, नन्द जू ने पूजे ताल।  
कौन के बाजे ढोल मंजीरा, कौन के नगारे पै ढाल  
यशोदा के बाजें ढोल मंजीरा, नन्द जू के बाजे ढाल।  
कौन ने बांटे लड्डुआ गुंजा, कौन ने छकाये माल  
जसुदा ने बांटे लड्डुआ गुंजा, नन्द जू ने छकाये माल।  
कौन पहराये लंहगा फरिया, कौन ने पटका माल  
जसुदा पहराये लंहगा फरिया, नन्द जू ने पटका माल।  
कौन ने लुटाये गहना गुरिया, कौन ने हीरा लाल।  
नांचे गावें सब ब्रजवासी, उछर-उछर दें ताल  
दै असीस मगन सब गोपी, चिरजीवो गोपाल॥

-----O-----



## श्री राधा जन्म बधाई

गावो गावो री बधायो, राणी कीरति के घर आज।।  
 रमक झमक के चलो भानुधर सज धज के सब साज  
 राजा श्री वृषभानु महल में मंगल के भये काज।  
 गांम गांम ते आई नारी लोगन जुरे समाज,  
 धौंसा की धधकार सुनो जहाँ ठाड़े हैं महाराज।  
 बीना वैन और सारंगी महुवर हू रहे बाज,  
 कोड नांवे कोड हाँसी देवें कौन करे हवां लाज।  
 अनहोनी भई लली सोहनी लोकन की सरताज,  
 जाके प्रगट होत बरसाने सबके दुख गये भाज।  
 नन्दगाँव ते नन्द जसोदा आये महल विराज,  
 कीरति जसुदा भेंटी जैसे भेंटी हैं द्वै गाज।  
 लालीढिंग लाला पौढ़ायो जोरी अति छविछाज,  
 पलना में खेलें और कितकैं रूप के दोउ जहाज।।

-----O-----

राधा जन्म भयौ बरसाने, आये नन्द यशोदा धाय।

सुन सुन फूलीं जसुदा माई  
 लिये गोद में कुँवर कन्हौई  
 गई जहाँ बज रही बधाई  
 नाचैं गावैं गीत मनोहर, आनन्द नहीं समाय।  
 ब्रज गोपी महलन में आवैं  
 कन्या लै के गोद खिलावैं  
 जसुमति कीरति हैंसैं हैंसावैं  
 या बेटी के ऊपर लाखों बेटा हू नहिं भाय।  
 कान्हा को राधा पै वारैं  
 तन मन प्राण सबै न्यौछारैं  
 देवन को अंचरा पैसारे  
 देख देख जसुदा की करनी कीरतिहू मुसकाय।  
 नंद वृषभानु सभा में ठाढ़े  
 कौंसी भर भर मिलै जु गाढ़े  
 पौरी में बज रहे नगाड़े  
 खुर और सींग मढ़ी सोने ते ऐसी दीनी गाय।।



आनन्द झूम रहो वृषभानु भवज में,  
राधा जलमी आय ॥

सब लोकन में बजी बधाई  
भादों सुदी अष्टमी आई  
पीरी फाट रही सुखदाई  
दुंदुभि नभ में देव बजावैं, फूलन कैं बरसाय।

ध्वजा पताका फहरन लागे  
बाजे बहुत बजावन लागे  
घर घर धूम मचावन लागे  
बरसाने की गलीगलिन में मंगल ही रह्यो छाय।

दूध दही के मांट दुरावैं  
ऐसी गाढ़ी कीच मचावैं  
कन्या को आसीस सुनावैं  
बहुतै भाग हमारे भैया या लाली को पाय।

सजी धजी गोपी जन आवैं  
उमा रमा के भाग लजावैं  
श्री राधा को तै दुलारवैं  
जाकौ ध्यान धरैं त्रिभुवनपति मोहनहु तरसाय ॥

राजी कीरति के कन्या भई, गाँवें नन्ददाय वृषभान

मंगल भयौ बड़ो अनहोनों  
आयो नन्द गाँव बरसानों  
इक संग नाँवें समधी दोनों

देखदेख जसुदा औ कीरति हंसि न्योछारैं प्रान।

मन्दिर के सब गली गिरारे  
चन्दन और अतर के गारे  
बहु सुगन्ध के बहैं पनारे

केला खम्भ धुजाऔर झालर मोतिन के बन्धान।

ऐसी धूम मची बरसाने  
नर-नारिन के जूथ जुराने  
बाजे बहुत बजे सहदाने

इक नाचै इक सैन चलावै, गावैं भीठे गान।

कहा बूढ़े कहा लोग लुगाई  
लैंकें चाव चले उमगाई  
बज रही आठों पहर बधाई

जै जैकार करैं अम्बर में चढ़ कें देव विमान।



अरि बरसाने बजी बधाई, कीरति ने लाली जाई॥

वन्दनवार बंधे महलन में  
अरि ऊंचे पै धुजा लगाई, कीरति ने..।

उमा रमा वाय धन्य कहैं  
अरि जो बरसाने की दाई, कीरति ने..।

हार दियो हियरे को रानी  
अरि वाय खपरा रतन भराई, कीरति ने..।

भानुमति राधा की भूआ  
अरि वो लेत नेग मन भाई, कीरति ने..।

दौरी-दौरी फिरे मलिनियां  
अरि वो तो फूलन गजरे लाई, कीरति ने..।

दौरी-दौरी फिरे ढांढिनी  
अरि वंसावलि नाच सुनाई, कीरति ने..।

जसुदा गावत चली बंधाये  
अरि वो तो भानुराय घर आई, कीरति ने..।

कनक थार में नीली झंगुली  
अरि वो चूरो हंसली लाई, कीरति ने..।

चाकवा चकई भौरा भौरी  
अरि वो संग में कुंवर कन्हार, कीरति ने..।

धन्य कुंख कीरति मैया की  
अरि जाते राधा ब्रज में आई, कीरति ने..।

जुग-जुग जीवें लली भानु की  
अरि सब दें असीस सुखदाई, कीरति ने..।

-----O-----

कीरति नू के कल्या भई, जे जे राधा रानी की॥

एक लली अनहोनी जनमी, जे जे राधा..।

वृन्दावन की रानी प्रगटी, जे जे राधा..।

मोहन की स्वामिनी प्रगट भई, जे जे राधा..।

महारास रासेश्वरी प्रगटी, जे जे राधा..।

करुणामयी स्वामिनी प्रगटी, जे जे राधा..।

प्रेमदायिनी स्वामिनी प्रगटी, जे जे राधा..।

रस विस्तारिणी स्वामिनी प्रगटी, जे जे राधा..।

हरिवंशकारिणी स्वामिनी प्रगटी, जे जे राधा..।

कृष्णाराध्या स्वामिनी प्रगटी, जे जे राधा..।



ब्रह्माराधा स्वाभिनी प्रगटी, जै जै राधा..।  
 कृष्ण सजीवनमूरी प्रगटी, जै जै राधा..।  
 कृष्णप्रिया श्री राधा प्रगटी, जै जै राधा..।  
 कृष्णप्राणाराधा प्रगटी, जै जै राधा..।  
 गोपीश्वरी किशोरी प्रगटी, जै जै राधा..।  
 कृष्ण पूर्जिता शक्ती प्रगटी, जै जै राधा..।  
 कृष्ण सेविता देवी प्रगटी, जै जै राधा..।  
 गौरांगी श्रीराधा प्रगटी, जै जै राधा..।  
 नित्ययौवने राधा प्रगटी, जै जै राधा..।  
 कमलांगी श्रीराधा प्रगटी, जै जै राधा..।  
 कृपाशीलनी राधा प्रगटी, जै जै राधा..।  
 दयाशीलनी राधा प्रगटी, जै जै राधा..।  
 प्रेमशीलनी राधा प्रगटी, जै जै राधा..।  
 कोकिल कंठी राधा प्रगटी, जै जै राधा..।  
 नित्यकिशोरी राधा प्रगटी, जै जै राधा..।  
 चित्सौंदर्या राधा प्रगटी, जै जै राधा..।  
 जै जै राधा रानी की, जै जै श्री महारानी की।।

आज बनी बधाई भोर, राधिका जन्म लियो।।  
 सिंहपौर चढ़ ऊंचे टेरें, अपने-अपने पटुका फेरें  
 ऊंचे कर रहे सोर, राधिका जनम लियो।  
 बजे निसान नगाड़े बारे, चोट दै रहे बल कर भारे  
 जैकारे दै रहे जोर, राधिका जनम लियो।  
 गाला लै रहे पाग पिछोरा, लाल गुलाबी पीरे घौरा  
 धोती पीरे छोर, राधिका जनम लियो।  
 लहंगा फरिया गोपी लै रही, रतनन के गहने लै पहरहिं  
 धन बरसै घनघोर, राधिका जनम लियो।  
 धूम मचावै नाचै गावै, घूघट मे ते सैन चलावै  
 मुसकावै मुख मोर, राधिका जनम लियो।  
 सोने मढ़ी गाय के ठाँ, दूध दही माखन के माँ  
 अंगना में रहे फोर, राधिका जनम लियो।  
 लोग परस्पर दै रहे हांसी, सबके परी प्रीति की फांसी  
 बंधे प्रेम की डोर, राधिका जनम लियो।  
 बरसाने की गली गलिन में, रस बरसै गह्वर कुंजन में  
 सरसै सांकरी खोर, राधिका जनम लियो।



ब्रह्माचल की ऊँची सिंखरन, मंदिर मान होय नित गायन  
मोर कुटी पै मोर, राधिका जनम लियो।  
सज के बैठी कीरति रानी, गोद स्थिये लाली सुखदानी  
सब ब्रज रस में बोर, राधिका जनम लियो।  
राधा नाम भयो रसदायी, राधा शरण रहत है कन्हैया  
भजौ मोह कौ तोर, राधिका जनम लियो॥

-----O-----

ऊपर के रसिया में "बंधे प्रेम की डोर..." तक केवल  
राधिका के स्थान पर कन्हैया बदल दो तो ठाकुर  
जी की बधाई इस प्रकार होगी...

आज बनी बधाई भोर, कन्हैया जन्म लियो॥  
बंधे प्रेम की डोर...तक पूर्ववत्...अब आगे इस प्रकार है...  
श्रीगोकुल की गली गलिन में, रस बरसै जमुना लहरन में  
रस की बड़े हिलोर, कन्हैया जनम लियो।  
सज के बैठी जसुमति रानी, गोद लिये कान्हा सुखदानी  
सब ब्रज रस में बोर, कन्हैया जनम लियो।  
नाम भयो रस कौ दायी, पलना खेलै कुंवर कन्हैया  
भजौ मोह कौ तोर, कन्हैया जनम लियो॥

ढाँढिनि कहै सजल सों हंस हंस,

तल बरसाने दोनुं जांय॥

रानी कीरति के भई कन्या तीन लोक भये धन्या,  
चलै बधाई गांवै नांचै पावैं जो मन भाय।  
ना मैं लूंगी लंहगा फरिया, नाय मैं लउंगी अंगिया,  
मैं तो मागूंगी रानी से बरसाने मोहि बसाय।  
ना मैं लूँगी सोना चांदी, मोती पन्ना हीरा,  
मैं तो लउंगी रानी के मुख को बीरा हुलसाय।  
ना मैं लूंगी हार हमेला, कड़ा कौंधनी छल्ला,  
मैं लउंगी राधा की झिगुली दैंगी कीरति माय।  
ऐसो नाच दिखाऊँ देखन हारे नाचैं सबरे,  
जो देखूँ कन्या के मुख को सबरी आस पुजाय॥

-----O-----

जन्म लियो राधा ने कीरति के बधाई आज॥  
रानी कीरति द्वारे आयो, मंगला एक अनन्य  
तेरे कूँखन राधा आई, तेरी काया धन्य।  
पुरुष जाति ते दान न लैहों, ये ही मेरी टेक,



उमा रमा हू ते नहि लैहैं, यह व्रत मेरो एक।  
भानु बाबा औ नंद बाबा, इनके उदार सब आता,  
कृष्ण सखन हू ते नहि लैहैं यद्यपी सब हैं दाता।  
जिनके कीरति कुंवरी पियारी, तिन ते दान हि लैहैं,  
तिनकी जूठन खाय तिनहि के चरनन माथो नैहैं।  
ललिता विशाखा चंपक चित्रा, तुंगविद्या इंदुलेखा,  
रंग देवि सुदेवि महासखि पूजो इनहि विसेखा।  
बरसाने प्रगटीं राधा पद, सेवें श्याम विहारी,  
होय बधार्ह राधा की जंह, नाचैं सब नर नारी।  
ज्ञानयोग संयम साधन व्रत, नहि देखैं भूलेहू,  
वृन्दावन की धूरि धरैं स्मिर, सेवैं तन दै मनहू।  
कछु न संग्रह करौं न मागौं, नहि कछु आस लगाऊँ,  
राधा नाम रटूं राधा जस, सुनूं राधिका ध्याऊँ।  
तुच्छ विषय की कौन कहै जब, मुक्ती हू तज जारौं,  
बरसाने के दूरे बसके, दिव्यलोक सब वारौं।  
सुनत बधार्ह कीरति भैया, कृपा करी मनमानी,  
खोल दियो भंडार कृपा कौ, लली दिखाई रानी।।

आज बधार्ह आज बधार्ह राधा जलनी आज बधार्ह।।  
आज भोर शहनाई बाजी राधा जनमी आई,  
मोधू बलम जगावन लागी पलका ते लुढ़काई।  
भाज चली मैं भानुभवन कौ चोटी खुल लहराई,  
देख न पाई धक्का लाग्यो जेठ गिर्यो भहराई।  
देख खिस्त्राय गयो देवरिया नाट्यो संग में आई,  
पीछे ते चूतर में धक्का दै गेरी मेरी माई।  
उठके भाज गई भीतर ते खट्टी छाछ लै आई,  
भर्यो माट देवर पै झार्यो हर गंगा अन्हवाई।  
तौ लौं मोटी सास हमारी आई लिये बधार्ह,  
ककिया सुसर को करके नंगो तारी रही बजार्ह।  
माखन के गोला लै फेंकैं दधि की कीच मचार्ह,  
गोपी गवाला गिर रहे ऊपर एक एक रपटार्ह।  
मोहड़े खोल द्वार ते देखे बूढ़ी एक लुगार्ह,  
लौंनी घुसी पोपले मोहड़े चाटै जीभ बढ़ार्ह।।

-----O-----



राधा जन्म बधाई होय, होय मेरी मैया ॥

कीरति के जनमी बाला  
जंह लुट रही मोती माला  
मोती छ र र र होय, होय मेरी मैया ॥

कोई माखन माट दुरावै  
दधि दूध पनारो बहावै  
झरना झ र र र होय, होय मेरी मैया ॥

कोई लड्डुवा लै लुङ्ककावै  
बरफी की चोट चलावै  
पापड़ प र र र होय, मोय मेरी मैया ॥

नाचै फिरकैयां लैके  
सब कूदैं तारी दैके  
तानन त न न न होय, होय मेरी मैया ॥

कोई महुवर बैन बजावै  
कोई गीत रसीले गावै  
ढोलक ढम ढम ढम होय, होय मेरी मैया ॥

सब नाच रही हैं गोरी  
श्री भानु भवन की पौरी

तुमके ठम ठम ठम ठम होय, होय मेरी मैया ॥

कोइ कर देवै गठजोरा  
नर नारी रस में बोरा

हांसी हा हा हा होय, होय मेरी मैया ॥

कोई ऐंड़ो ऐंड़ो डोलै  
मटकै चटकै रस छोलै

धुंधरु छम छम छम होय, होय मेरी मैया ॥

-----O-----

बधाई बाजै भानुराय दरबार ॥

बजे नगाड़े बड़े भोर ही जनमी भानुदुलार,  
घननननननन घंटा बाजै धौंसा की धधकार ।  
दधि कौ कांदौ अंगना में भयो बह रहे खार पनार,  
माखन के लौंदा फिक रहे जंह बही दूध की धार ।  
गोपी नाचै झूमक फुंदना लटके झुब्बादार,  
फरिया फरर कर सैंकारो लंहगा धूमधुमार ।  
गाला गावैं उछर-उछर ढोलक झांझन झनकार,



भानुराय की लाली जीवै कीरति की सुकुमार ।  
ब्रह्मा नांचै विष्णू नांचै नांचै शिव त्रिपुरार,  
तैतिस कोटी देवता नांचै दै दै के जैकार ।  
राधा वृन्दावन की रानी महारानी रस सार,  
जाको पग चापै चरो बन रसिया नंदकुमार ॥

-----O-----

चलो लै के बधाई आज री ॥

कीरति ने राधा है जाई रसिकन की सरताज री ।  
बजे नगाड़े धूं धुंकारे बाजे बहुतै बाज री ।  
कंचन थार हार मोतिन के चौक पुरावन काज री ।  
गोरी लाली नीली झंगुली और खिलौना साज री ।  
भौरा की भिर और चकई की फिर, छूटी आतसबाज री ।  
देस देस के ढांढी ढाढ़न, भांडन जुरी समाज री ।  
भान दान दै धन बरसा करि, दुख दलिहर भाज री ।  
दधि कांदो महलन में है रह्यो, आनंद को है राज री ।  
फैल रह्यो जस बरसाने कौ सब धामन पै गाज री ।  
जहां बुहारी रमा लगावै, अद्भुत शोभा छाज री ।  
गावो गीत जनम मंगल के, नाचौ तज के लाज री ॥

बाजै बाजै आज बधाई, माई सोहिलो ॥

सोय रही बड़े भोर ही  
सुनी महलन में शाहनाई, माई सोहिलो ।  
उमा रमा बरसाने आई  
रूप बनाई बनाई, माई सोहिलो ।  
कोई बनी मालिन कोई बनी ढांढिन  
दाई कौ रूप बनाई, माई सोहिलो ।  
महादेव ब्रह्मा संब धाये  
बरसाने में आई, माई सोहिलो ।  
कोई न्हाय रही कोई जेय रही  
कोई सब सिंगार सजाई, माई सोहिलो ।  
अपने-अपने घर ते सज-सज  
चली सुंदरी धाई, माई सोहिलो ।  
पहुंची भानु भवन जंह बज रहि  
आठो पहर बधाई, माई सोहिलो ॥

-----O-----